



ქალაქ ბათუმის მუნიციპალიტეტის მერი

ქ. ბათუმი

02/06/2015

ბ რ ძ ა ნ ე ბ ა N 392

**შეზღუდული პასუხისმგებლობის საზოგადოება -
„შავი ზღვის ფლორისა და ფაუნის შემსწავლელი
სამეცნიერო-კვლევითი ცენტრი“-ს წესდების
დამტკიცების შესახებ**

საქართველოს ორგანული კანონის „ადგილობრივი თვითმმართველობის კოდექსის“, „მეწარმეთა შესახებ“ საქართველოს კანონის და ქალაქ ბათუმის მუნიციპალიტეტის საკრებულოს 2014 წლის 29 აგვისტოს №19 დადგენილებით დამტკიცებული „ქალაქ ბათუმის მუნიციპალიტეტის მერიის დებულების“ მე-3 მუხლის მე-3 პუნქტის „ე.მ“ ქვეპუნქტის შესაბამისად,

ვ ბ რ ძ ა ნ ე ბ ა :

1. დამტკიცდეს შეზღუდული პასუხისმგებლობის საზოგადოება - „შავი ზღვის ფლორისა და ფაუნის შემსწავლელი სამეცნიერო-კვლევითი ცენტრი“-ს (ს/კ №245626443) თანდართული წესდება.
2. ძალადაკარგულად გამოცხადდეს თვითმმართველი ქალაქის - ბათუმის საკრებულოს 2011 წლის 31 იანვრის №21 განკარგულებით დამტკიცებული შეზღუდული პასუხისმგებლობის საზოგადოება - „შავი ზღვის ფლორისა და ფაუნის სამეცნიერო-კვლევითი ცენტრი“-ს წესდება.
3. შეზღუდული პასუხისმგებლობის საზოგადოება - „შავი ზღვის ფლორისა და ფაუნის შემსწავლელი სამეცნიერო-კვლევითი ცენტრი“-ს დირექტორს (დავით ლევკეიშვილი, პირადი ნომერი 61001008321) დაევალოს წინამდებარე ბრძანებით განხორციელებული ცვლილების შესაბამისად კანონმდებლობით გათვალისწინებული ღონისძიებების განხორციელება.

4. ბრძანება შეიძლება გასაჩივრდეს ბათუმის საქალაქო სასამართლოში (მის.: ქ.ბათუმი, ზუბალაშვილის ქ. №30) მისი კანონმდებლობით დადგენილი წესით გაცნობიდან ერთი თვის ვადაში.

5. ბრძანება ძალაშია ხელმოწერისთანავე.

გიორგი ერმაკოვი

A handwritten signature in black ink, appearing to be 'Giorgi Ermakov', followed by a long horizontal line.

ქ. ბათუმის მუნიციპალიტეტის მერი

**შეზღუდული პასუხისმგებლობის საზოგადოება
„შავი ზღვის ფლორისა და ფაუნის შემსწავლელი
სამეცნიერო-კვლევითი ცენტრის“**

წესდება

მუხლი 1. ზოგადი დებულებები

1. შეზღუდული პასუხისმგებლობის საზოგადოება „შავი ზღვის ფლორისა და ფაუნის შემსწავლელი სამეცნიერო-კვლევითი ცენტრი“ (შემდგომში საზოგადოებად წოდებული) შექმნილია „მეწარმეთა შესახებ“ საქართველოს კანონის შესაბამისად.
2. საზოგადოება იქმნება განუსაზღვრელი ვადით.
3. საზოგადოების სამეურნეო წელი ემთხვევა კალენდარულ წელს. დრო საზოგადოების რეგისტრაციიდან რეგისტრაციის წლის 31 დეკემბრამდე შეადგენს ერთ ნაკლულ სამეურნეო წელს.

მუხლი 2. საზოგადოების სრული და შემოკლებული სახელწოდება

1. საზოგადოების სრული სახელწოდებაა: შეზღუდული პასუხისმგებლობის საზოგადოება „შავი ზღვის ფლორისა და ფაუნის შემსწავლელი სამეცნიერო-კვლევითი ცენტრი“.
2. საზოგადოების შემოკლებული სახელწოდებაა: შპს „შავი ზღვის ფლორისა და ფაუნის შემსწავლელი სამეცნიერო-კვლევითი ცენტრი“.

მუხლი 3. საზოგადოების იურიდიული მისამართი და სტატუსი

1. საზოგადოების იურიდიული მისამართია: საქართველო, ქ. ბათუმი, რუსთაველის ქ. №51.
2. საზოგადოება არის იურიდიული პირი, რომელიც ფუნქციონირებს საქართველოს მოქმედი კანონმდებლობით და წინამდებარე წესდების შესაბამისად.
3. საზოგადოება იურიდიული პირის უფლებებს და მოვალეობებს იძენს დადგენილი წესით რეგისტრაციის დღიდან.

მუხლი 4. საქმიანობის საგანი

1. საზოგადოება ახორციელებს ნებისმიერ საქმიანობას, რომელიც არ არის აკრძალული საქართველოს კანონმდებლობით, მათ შორის:
 - ა) შავი ზღვის საქართველოს ტერიტორიული წყლების დაბინძურების მდგომარეობისა და ზღვის მიკრობიოლოგიური შემადგენლობის კვლევა დაავადებული ცხოველების გამოვლენისა და რეაბილიტაციის მიზნით;
 - ბ) სამეცნიერო-კვლევითი საქმიანობა ზღვის ფაუნის ქცევითი რეაქციის შესწავლის მიზნით;
 - გ) სამეცნიერო-კვლევითი საქმიანობა ზღვის ბინადართა მოვლისა და მათი განვითარების სრულყოფის მიზნით;
 - დ) სპორტულ-სარეკრეაციო კომპლექსების შექმნა და ექსპლუატაცია;

ე) მოზარდი თაობებისათვის საბავშვო ცენტრების შექმნა და ამ მიზნით ხელოვნურ და ბუნებრივ პირობებში წყლისა და ხმელეთის ბინადართა კვლევა, მოვლა, წვრთნა და დემონსტრაცია;

ვ) მოსახლეობაში და მოზარდებში ბუნების დაცვის, ბუნებისადმი არამომხმარებლური დამოკიდებულების და ეკოლოგიური პრინციპების პოპულარიზაცია და ამ მიზნით ბუკლეტებისა და სხვა საინფორმაციო მასალის გამოშვება-რეალიზაცია;

ზ) მარიკულტურის განვითარება (მიდიური და ოჩხური მეურნეობის შექმნა);

თ) გარემოს ეკოლოგიური პრობლემების შესწავლა-ანალიზი და გარემოს დაცვით საქმიანობაში ახალგაზრდობის დაინტერესება და ჩართვა;

ი) სანახაობრივი - გასართობი პროგრამების, სპორტული ღონისძიებების შემუშავება და რეალიზაცია, კულტურული დასვენების ობიექტების, სპორტული კომპლექსების ჩამოყალიბება და მომსახურება;

კ) „6 მაისის პარკის“ ტერიტორიაზე არსებული მწვანე ნარგავების, დეკორატიული მცენარეების, ტბის მოვლა-პატრონობა, განახლებისა და აღდგენის სამუშაოების წარმოება;

ლ) მსოფლიოს და ადგილობრივი ფაუნის წარმომადგენლების - ტყეობაში მყოფი ცხოველების მოვლა-პატრონობა და მათი პოპულარიზაცია;

მ) ქალაქის მოსახლეობისა და სტუმრებისათვის ცხოველთა სანახაობითი ღონისძიებების მოწყობა;

ნ) „6 მაისის პარკის“ განვითარების პერსპექტიული გეგმების შედგენა;

ო) სხვადასხვა ჯიშის თევზების ყოლა, მოვლა-პატრონობა, მათი მრავალფეროვნებისათვის ზრუნვა, დემონსტრირება და პოპულარიზაცია.

2. საქმიანობის იმ სახეების განსახორციელებლად, რომლებიც ექვემდებარებიან ლიცენზირებას, საზოგადოება ვალდებულია კანონმდებლობით დადგენილი წესით მიიღოს ლიცენზია.

მუხლი 5. საზოგადოების პარტნიორები და საწესდებო კაპიტალი

1. საზოგადოების პარტნიორი არის: ქალაქ ბათუმის მუნიციპალიტეტი, წარმოდგენილი ქ. ბათუმის მუნიციპალიტეტის მერის სახით.

2. საზოგადოების გამოცხადებული საწესდებო კაპიტალი შეადგენს 20 (ოცი) ლარს ფულადი შენატანით.

3. პარტნიორების წილი საწესდებო კაპიტალში განისაზღვრება შემდეგნაირად: - 20 (ოცი) ლარი, შესაბამისად, წილი საწესდებო კაპიტალში - 100%.

მუხლი 6. პარტნიორთა კრება

1. საზოგადოების მართვის უმაღლესი ორგანოა პარტნიორთა კრება, რომელიც წარმოადგენს საზოგადოების საქმიანობას.

2. პარტნიორთა კრება იღებს გადაწყვეტილებას ყველა საკითხზე. კერძოდ:

ა) საზოგადოების წესდების დამტკიცება, მასში ცვლილებებისა და დამატებების შეტანა;

ბ) კანონმდებლობით დადგენილი წესით პარტნიორის მიერ წილის გასხვისება მესამე პირებზე;

გ) სამეურნეო პოლიტიკის ზოგადი პრინციპების განსაზღვრა;

დ) ფილიალების შექმნა და ლიკვიდაცია;

ე) უძრავი ქონების შეძენა, გასხვისება და დატვირთვა;

ვ) ხელმძღვანელ მუშაკთათვის მოგებისა და საერთო შემოსავალში მონაწილეობის პრინციპების განსაზღვრა;

ზ) საზოგადოების სამტატო განრიგის დამტკიცება;

თ) დირექტორის დანიშვნა და გამოწვევა, მასთან შრომის ხელშეკრულებების დადება და შეწყვეტა, აგრეთვე მისი ანგარიშის დამტკიცება;

- ი) წლიური შედეგების დამტკიცება და შედეგების გამოყენება;
- კ) პროკურის გაცემა და გაუქმება;
- ლ) სანახაობრივ ღონისძიებებზე დასწრებისა და სხვა მომსახურების ფასების დამტკიცება;
- მ) აგრეთვე სხვა საკითხები, რომლებიც სცილდება საზოგადოების ჩვეულებრივი საქმიანობის ფარგლებს ან/და რომლებზეც პარტნიორთა კრება დაადგენს პარტნიორთა კრების გზით გადაწყვეტილების მიღების აუცილებლობას.

მუხლი 7. დირექტორი

1. საზოგადოების ხელმძღვანელობა და წარმომადგენლობა ეკისრება დირექტორს, რომელსაც თანამდებობაზე ნიშნავს და თანამდებობიდან ათავისუფლებს ქ. ბათუმის მუნიციპალიტეტის მერი.
2. ხელმძღვანელობით საქმიანობად მიიჩნევა მოქმედება, რომელიც პირდაპირ ან არაპირდაპირ ემსახურება საზოგადოების მიზანს.
3. დირექტორი წარმოადგენს საზოგადოებას მესამე პირებთან სამრთლებრივ ურთიერთობაში. ის მოქმედებს ერთპიროვნულად და მისი წარმომადგენლობითი უფლებამოსილება მესამე პირთან ურთიერთობაში არ არის შეზღუდული, გარდა საქართველოს კანონმდებლობით ან/და წინამდებარე წესდებით გათვალისწინებული შემთხვევებისა.
4. დირექტორს არ აქვს უფლება პარტნიორის თანხმობის გარეშე მისდიოს იმავე საქმიანობას, რასაც მისდევს საზოგადოება ან მიიღოს მონაწილეობა მსგავსი ტიპის სხვა საზოგადოებაში პერსონალურად პასუხისმგებელი პარტნიორის ან დირექტორის სახით. ამ თანხმობის გაცემა შეუძლია პარტნიორთა კრებას. ასეთ საქმიანობაზე თანხმობა მიცემულად ჩაითვლება, თუ საზოგადოების ხელმძღვანელად დანიშნისას პარტნიორისათვის ცნობილი იყო, რომ საზოგადოების ხელმძღვანელი ეწევა ასეთ საქმიანობას და ამ საქმიანობის შეწყვეტა მისთვის აშკარად არ მოუთხოვიათ.
5. დირექტორი საზოგადოების საქმეებს უნდა გაუძღვეს კეთილსინდისიერად. თუ ის არ შეასრულებს ამ მოვალეობას, წარმომადგენელი ზიანისათვის პასუხს აგებს პარტნიორის წინაშე, თუ ვერ დაამტკიცებს, რომ მას არ დაურღვევია თავისი მოვალეობა.
6. დირექტორი პასუხისმგებელია იმაზე, რომ საზოგადოების საბუღალტრო საქმეები და აღრიცხვა წარმოებდეს საქართველოში მოქმედი საბუღალტრო აღრიცხვისა და ანგარიშების კანონმდებლობის შესაბამისად.
7. დირექტორი ვალდებულია ათი წლის განმავლობაში შეინახოს კანონით გათვალისწინებული ყველა დოკუმენტი საზოგადოების საქმიანობაზე.
8. სამეურნეო წლის პირველი თვის განმავლობაში დირექტორმა უნდა შეადგინოს გასული სამეურნეო წლის წლიური ბალანსი, ანგარიში მოგება-ზარალის შესახებ (წლიური ანგარიში), ასევე საქმიანობის ანგარიში და უნდა წარუდგინოს დამფუძნებელს.
9. დირექტორი უფლებამოსილია:
 - ა) დაამტკიცოს საზოგადოების დოკუმენტები;
 - ბ) მიიღოს და გაათავისუფლოს საზოგადოების თანამშრომლები;
 - გ) წახალისოს და დისციპლინური პასუხისმგებლობა დააკისროს თანამშრომლებს მოქმედი კანონმდებლობის საფუძველზე;
 - დ) დადოს გარიგებები და გასცეს მინდობილობები იმ საკითხებზე, რაც შედის მის უფლებამოსილებებში;
 - ე) გახსნას ანგარიშები;
 - ვ) გამოსცეს საორგანიზაციო-განმკარგულებელი ხასიათის დოკუმენტები;
 - ზ) გადაწყვიტოს კანონმდებლობით და საზოგადოების წესდებით გათვალისწინებული სხვა სახის საკითხები.

მუხლი 8. დირექტორის დროებით მოვალეობის შემსრულებლის განსაზღვრა

საზოგადოების დირექტორის მიერ თავისი უფლებამოსილების განხორციელების შეუძლებლობის (დროებითი შრომისუნარობის გამო) ან სხვა საფუძვლის არსებობისას დირექტორისათვის შრომითი ურთიერთობის დროებით შეჩერების დროს ამავე საზოგადოების თანამშრომელთაგან დირექტორის დროებით მოვალეობის შემსრულებლის განსაზღვრის შესახებ გადაწყვეტილებას ღებულობს ქ. ბათუმის მუნიციპალიტეტის მერი.

მუხლი 9. საზოგადოების სტრუქტურა

1. საზოგადოების სტრუქტურა და სტრუქტურაში შემავალი თანამშრომლების რაოდენობა და თანამდებობრივი სარგოს ოდენობა განისაზღვრება ქალაქ ბათუმის მუნიციპალიტეტის მერის მიერ დამტკიცებული საშტატო განრიგის შესაბამისად.

2. საზოგადოების თანამშრომელთა უფლებამოსილებები (თანამდებობრივი ინსტრუქციები) საზოგადოების ფუნქციებიდან გამომდინარე განისაზღვრება დირექტორის სამართლებრივი აქტით - ბრძანებით.

მუხლი 10. წლიური შედეგები

1. პარტნიორს აქვს წლიური გაუნაწილებელი მოგების მიღების უფლება ნაშთის ჩათვლით და ზარალის გამოკლებით.

2. შედეგების გამოყენების შესახებ გადაწყვეტილების მიღებისას პარტნიორს შეუძლია თანხა მოგებიდან ანარიცხებში ჩარიცხოს ან წარმოადგინოს როგორც მოგება.

მუხლი 11. საზოგადოების საქმიანობის შეწყვეტა

1. საზოგადოება წვეტს საქმიანობას:

ა) პარტნიორთა კრების გადაწყვეტილებით;

ბ) კანონით გათვალისწინებულ სხვა შემთხვევებში.

2. საზოგადოების საქმიანობის შეწყვეტა ხდება მისი რეორგანიზაციის (შერწყმის, შეერთების, გაყოფის, გარდაქმნის) ან ლიკვიდაციის გზით.

3. საზოგადოების რეორგანიზაციის შემთხვევაში მისი ყველა უფლება და ვალდებულება გადაეცემა მის უფლებამონაცვლეს.

4. ლიკვიდაცია ხორციელდება მოქმედი კანონმდებლობით დადგენილი წესით.



ქალაქ ბათუმის მუნიციპალიტეტის მერი

ქ. ბათუმი

26/06/2015

ბ რ ძ ა ნ ე ბ ა N 468

შეზღუდული პასუხისმგებლობის საზოგადოება - „შავი ზღვის
ფლორისა და ფაუნის შემსწავლელი სამეცნიერო-კვლევითი ცენტრი“-ს
წესდებაში ცვლილების შეტანის თაობაზე

საქართველოს ორგანული კანონის „ადგილობრივი თვითმმართველობის კოდექსის“, „საქართველოს სამოქალაქო კოდექსის“, „მეწარმეთა შესახებ“ საქართველოს კანონის, ქალაქ ბათუმის მუნიციპალიტეტის საკრებულოს 2014 წლის 29 აგვისტოს №19 დადგენილებით დამტკიცებული „ქალაქ ბათუმის მუნიციპალიტეტის მერიის დებულების“ მე-3 მუხლის მე-3 პუნქტის „ე.მ“ ქვეპუნქტის შესაბამისად,

ვ ბ რ ძ ა ნ ე ბ ა :

1. შეზღუდული პასუხისმგებლობის საზოგადოება - „შავი ზღვის ფლორისა და ფაუნის შემსწავლელი სამეცნიერო-კვლევითი ცენტრი“-ს (ს/კ №245626443) წესდებაში (დამტკიცებული ქალაქ ბათუმის მუნიციპალიტეტის მერის 2015 წლის 02 ივნისის №392 ბრძანებით) შეტანილი იქნას ცვლილება და წესდების მე-6 მუხლის მე-2 პუნქტის „ლ“ ქვეპუნქტი ჩამოყალიბდეს შემდეგი რედაქციით:

„ლ) სანახაობრივ ღონისძიებებზე დასწრებისა და სხვა მომსახურების ფასების შეთანხმება“.

2. შეზღუდული პასუხისმგებლობის საზოგადოება - „შავი ზღვის ფლორისა და ფაუნის შემსწავლელი სამეცნიერო-კვლევითი ცენტრი“-ს დირექტორს (დავით ლევკიშვილი, პირადი ნომერი 61001008321) დაევალოს წინამდებარე ბრძანებით განხორციელებული ცვლილების შესაბამისად კანონმდებლობით გათვალისწინებული ღონისძიებების განხორციელება.

3. ბრძანება ძალაშია ხელმოწერისთანავე.

გიორგი ერმაკოვი

ქ. ბათუმის მუნიციპალიტეტის მერი



ქალაქ ბათუმის მუნიციპალიტეტის მერი

ქ. ბათუმი

20/11/2017

2095-25-4-201711201500



ბ რ ძ ა ნ ე ბ ა N 2095

შეზღუდული პასუხისმგებლობის საზოგადოება
„შავი ზღვის ფლორისა და ფაუნის შემსწავლელი
სამეცნიერო-კვლევითი ცენტრი“-ს წესდებაში
ცვლილების შეტანის თაობაზე

საქართველოს ორგანული კანონის „ადგილობრივი თვითმმართველობის კოდექსი“ 106¹ მუხლის მე-5 პუნქტის შესაბამისად,

ვ ბ რ ძ ა ნ ე ბ ა :

1. შეზღუდული პასუხისმგებლობის საზოგადოება „შავი ზღვის ფლორისა და ფაუნის შემსწავლელი სამეცნიერო-კვლევითი ცენტრი“-ს (ს/კ №245626443) წესდების (დამტკიცებული ქალაქ ბათუმის მუნიციპალიტეტის მერის 2015 წლის 02 ივნისის №392 ბრძანებით) მე-7 მუხლს დაემატოს შემდეგი შინაარსის 1¹; 1²; 8¹; 8² და 8³ პუნქტები:

„1¹. დირექტორი თანამდებობაზე ინიშნება ერთი სამეურნეო წლის ვადით, რომელიც მოიცავს წლის დასაწყისიდან - 1 იანვრიდან წლის დასასრულამდე 31 დეკემბრის ჩათვლით პერიოდს (კალენდარული წელი).

1². ქ. ბათუმის მუნიციპალიტეტის მერი (პარტნიორთა კრება) უფლებამოსილია ვადაზე ადრე გაათავისუფლოს დირექტორი დაკავებული თანამდებობიდან ან გაუგრძელოს უფლებამოსილების ვადა ერთი სამეურნეო წლით.

8¹. დირექტორს უფლება არ აქვს გამოიტანოს ნაღდი ფული საზოგადოების საბანკო ანგარიშ(ებ)იდან.

8². დირექტორს უფლება არ აქვს საბანკო ოპერაციები (გადარიცხვები) აწარმოოს მთავარი ბუღალტერის ავტორიზაციის გარეშე. თუ საზოგადოებას არ ჰყავს მთავარი ბუღალტერი, მაშინ აღნიშნულ უფლებამოსილებას დირექტორთან ერთად ახორციელებს თანამშრომელი, რომელიც თანამდებობრივად პასუხისმგებელია საბუღალტრო აღრიცხვაზე.


8³. დირექტორი ვალდებულია ყოველთვიურად (პირველ დეკადაში) დამფუძნებელ პარტნიორს წარუდგინოს ამონაწერ(ებ)ი საწარმოს საბანკო ანგარიშ(ებ)იდან მიმდინარე თვის პირველი რიცხვის მდგომარეობით.“.

2. წინამდებარე ბრძანებით შეზღუდული პასუხისმგებლობის საზოგადოება „შავი ზღვის ფლორისა და ფაუნის შემსწავლელი სამეცნიერო-კვლევითი ცენტრი“-ს წესდებაში განხორციელებული ცვლილება ვრცელდება ასევე ამ ცვლილების ამოქმედებამდე დანიშნულ დირექტორზეც, რაც ნიშნავს, რომ მოქმედი დირექტორის უფლებამოსილების ვადაა 2017 წლის 31 დეკემბრის ჩათვლით პერიოდი.

3. ქ. ბათუმის მუნიციპალიტეტის მერიის აპარატის იურიდიული განყოფილების უფროსს (ვახტანგ გედენიძე, პირადი ნომერი: 61001051657) დაევალოს წინამდებარე ბრძანებით განხორციელებული ცვლილების შესაბამისად კანონმდებლობით გათვალისწინებული ღონისძიებების განხორციელება.

4. ბრძანება ძალაშია ხელმოწერისთანავე.

ლაშა კომახიძე



ქ. ბათუმის მუნიციპალიტეტის მერი